

# DOAKRIESSE ZEEK MIT

Teksdichter **Edwin Peelen**  
Toeëndichter **Edwin Peelen**  
Oetveurend arties **45èlf**  
Arrangement **Joep Servais**  
Ópnametechniek **Marlstone Music**

[koeplet ee]

Doe sjtaps geregeld mit dieng bing oet 't verkieëde bed.  
Has mit verbouwe wer ins nit óp de vergunninge gelet.  
Es jónkgezel, de letse kieër, biste d'r ganse oavend zaat,  
mar 't s'-aangerdaags, óp 't sjtadhoes, kunste wal vief kwarter te laat.  
Mit hoeëge noeëd haste gewaterd in de vuurtuin van pastoer  
of sjoemels mit de sjtumme van ee vasteloavesleedkonkoer.  
Doe zeëgs mit ópzat, van dieng buurlùj, gans d'r kieësjeboom kapót  
of sjnaps de vrouw van diene baas ins efkes sjtiekum bei de v... hank.

[refring]

Doa kriesse zeek mit. Noe loat 't zieë.  
Dus mak dich zelve mar nieks wies. Drek hingste wurklig in de pries.  
Doa kriesse zeek mit. Huur doa mit óp.  
Al liekste sjlauwer wie de res. Doe has 't good vuur dich verpes.  
Want mieëstal lupt 't oet óp pech.  
Van al die kiere, zalste nieks liere.  
Doe dinks: "Doa kóm ich wal mit weg!"  
en sjpils alwer d'r sjieke heer, mar bis wie sjtroatedrek zoëë vrech.  
Doa kriesse zeek mit. Noe waat mar aaf.  
Me ziet va hóngerd meter wiet al joa dat gieët alling mar sjtriet.

[koeplet twee]

Doe weësj durch de pliese zónger riebewies gesjnap  
en bei 't bónne sjrieve haste ekstra op 't gaas getrap.  
Doe gieës 't Ans vuur uche trouwdaag sjokkelaat en ee boeket,  
maar óp 't keëtje in de blómme sjteet: "Ich haot va dich, Sjanet."  
Doe hast d'r moandloeën van dieng vrouw in 't casino ópgemak  
en in de hoeëgmestoen ee deel van de kollekte trükgepak.  
Doe sjuuts d'r esj van oma zieëliger mit Aodjoar in de lóch  
of has dieng sjoënmam graad vuur vieftig cent óp marktplaatsj verkoch.

[refring]

[tusjestuk]

't Is genau dát wat d'r Adam teëge 't Eva hat gezag,  
wie hèt 'm mit deë appel in verleiding hat gebrach.  
D'r hoeëgste chef van 't paradies hat ós gelierd dat wat nit maag,  
mar doe begees d'r zóndeval wal zieëve kier per daag.

[refring]

Weë zich de batse döks verbrent,  
deë is de bloare wal gewend.  
Van wats-doe dees doa kriesse kaal,  
mar dich liekt alles gans egaal.